

(四縣腔) 編號 01 號

【鬧熱个落雨天】 曾菁怡原作

鬧鐘仔鈴、鈴、鈴響哩！大嫲聲喊佢遽遽趺床，再過忍床就會赴毋掣去學校讀書哩啲。佢目西西仔伸手去攷忒鬧鐘，又過橫落眠床，捨毋得摺佢分開。欸！毋係天光咗？外背仰會還係暗摸胥疏？探頭看往出，原來係天公派烏雲來通知佢兜——愛落雨哩！

有人認為落雨天係麻煩天，出外愛著水衣仔，無就擎遮仔，一無細義衫褲又會涿到濕漉漉仔，愛去哪仔都毋方便。學生仔盡惱無法度出去打球仔、搞寮，一下課就會分先生掌等，麼人都做毋得出去涿雨，故所見看啊著落雨，大家就唉唉唧唧，眼盯盯仔看等雨水號等歸隻个運動坪，實在還慍悴哦！

毋過，落雨天對佢來講顛倒係異鬧熱个日仔。朝晨頭一出門，滿街路都係恹恹个車仔，這片嘩嘩、該位叭叭，像久見个朋友相借問樣仔，大家相賽尖共下講起恁久無看著个思念。該兜行路个人，擎等一支支个遮仔花，分雨水淋啊過，跔等就開出各色个花彩，換去換轉像在該比看麼人个花較靚樣仔。你係同佢聽較真兜仔，該雨水打在車仔頂、屋頂、水窟仔還過樹葉仔頂高个

聲，全部都無共樣，有高音、有低音，有大聲、有細聲，像係在該唱歌仔分你聽樣仔。成時，雷公還會用曠燼來打燈光，用響雷公來和聲，恁樣講起來，係毋係異生趣？

佢盡好在落雨天打早就去學校，因為該兜平常時固核核个蠅螺仔¹、蟻公全部都會趟出來搞水。學校个圍牆²係紅毛泥作个，壁頂生个溜苔青里里仔，落雨該下，蠅螺仔趟上趟下陣打陣，相賽看麼儕蹶較遽，有个彎來幹起做起畫圖个藝術家，有个停跔在圍牆頂高享受分雨涿个清涼、逍遙、還過自在。

落雨天出來搞寮个蟻公盡好膽，衫褲無著就緊拚拚仔走出來搞水，溝壩肚朗朗滾个水流緊沖等來佢也毋驚。有幾下尾蟻公分水沖啊去還會搖來擺去，暢到奈毋得。有个蟻公大擘擘仔趟到路項來，較砸身个還做得趟轉去；較慳个將就橫在路徑頭，分天公做主哩！

鬧熱个落雨天，有人懊惱，有人歡喜，天公無法度合每一儕人个意，就愛自家改變想法，不管麼个天都係盡好个天。

¹ 蠅螺仔：音 se∨ lo∨ e\；蝸牛。

² 圍牆：音 tu∨ xiong∨；圍牆。

(四縣腔) 編號 02 號

【阿公个杭菊】黃麗芬原作

毋知對哪久開始，阿公就逐日在該等天光。

天一光，阿公緊拚拚仔就想愛出去，像愛赴等去約會樣仔恁歡喜。佢成時用行个，成時騎自行車，就好滿哪仔緊行。佢毋會像別人逐朝晨在 LINE 群組傳貼圖問早，佢就淨去廟項拜喏、在廟前个大樹下看人行棋仔就算有打卡報到也。厥盡尾一站係在阿婆盡好去个菊花田項坐等看花、看樹、看人、看鳥仔，恬恬仔做無聲个交流，看過願也自然就會轉屋，這係佢簡單生活个快樂。

有一日到臨暗仔阿公還言轉屋，這係從來都毋識恁樣个。歸屋下人緊張到無結無煞歸莊頭去尋，落尾¹正在菊花田項尋著。阿公哪知佢兜有幾愁慮，嘎毛蟹吊頸——尋無頭縲²緊問：「菊花仰做下無咧？」毋管佢兜仰仔應佢，佢就係毋信，淨會譴等緊罵講：「恁花蓼！恁花蓼！」原來，至寶个東西毋見忒，理智也會守毋核。

「阿公，你看！阿婆同菊花——兩蕊花。」一轉到屋下，佢

煞煞去阿公个間房拿出佢放在拖箱仔个相片，這係佢同阿婆兩儕在銅鑼九湖个菊花田項翕个，乜係佢兩子阿公个秘密。這張相片雖然有兜仔褪色，還係看得清楚滿田坵个菊花一蕊一蕊仔，有白乜有黃，佢兜个笑容同大自然个靚各有錫人个所在，無想著這嘎係阿婆過身後阿公唯一个回憶同紀念。佢心肝肚知：「『情字這條路』个歌仔，阿公係仰仔唱都唱毋會煞咧……。」

對該日起勢，佢兜胚想阿公交著一個新朋友，安到「阿茲海默³先生」。佢毋知係對哪位來个，三不五時會來尋阿公，來个時節都會帶等記憶个梓仔做等路送分阿公，大埕个、細埕个、麼个形仔都有。佢兩儕共下个時間緊來緊長，緊來緊鬥搭，害阿公毋係奈到毋知好轉屋，就係買乜一千擔共樣共樣个東西轉來，還過來來去去緊尋：「阿婆呢？」恁樣个情況實在分人愁慮，故所佢兜準備了一個胸章結在阿公个面衫項，胸章面頂高寫等阿公个名仔同屋下个電話號碼，續等詐意仔同阿公講：「恁樣，阿婆就會同你共下去看花哩！」真真假假，有夢盡靚，希望相隨。

總會天光个！佢兜會同盡遠个距離——「想念」拉兼來，同盡靚个記憶——「阿婆」好好囤在心肝肚。

¹ 落尾：音 lab\ mi\；最後。

² 毛蟹吊頸——尋無頭縲：音 mo\ hai\ diau\ giang\ ——qim\ mo\ teu\ tag\ ；吊頸，指的是上吊。尋無頭縲，指找不到頭的部分細綁，引申為做事找不到重點，摸不著頭緒。

³ 阿茲海默：音 a\ zii\ hoi\ med；阿茲海默症(Alzheimer's disease)。